

共同經課 - 1 以賽亞書六十五章十七節~二十五節

17 看 ah, 我創造新天新地, 以前 ê 事無 koh 記念, 亦無 koh 追想。18 Lín tiòh 因為我所創造 ê 來永遠歡喜快樂; 因為我創造耶路撒冷做歡喜 ê, 創造伊 ê 百姓做快樂 ê。19 我 beh 因為耶路撒冷來歡喜, 因為我 ê 百姓來快樂; 其中的確無 koh 聽見啼哭 ê 聲, kap 哀喙 ê 聲。20 其中的確無有幾日 á 死去 ê 嬰 á, 亦無有歲壽無滿足 ê 老人; 因為一百歲死 ê, iáu 算是 gín-ná, 一百歲死 ê 罪人, iáu-kú 是受咒詛 ê。21 In beh 起厝, 家己 khiā 起; 栽種葡萄園來食伊 ê 果子。22 In 無 beh 起造, hō 別人 khiā 伊; in 無 beh 栽種, hō 別人食伊; 因為我 ê 百姓 ê 日子 beh 親像樹 ê 日子; 我揀 ê 百姓親像 tiòh 磨得 tiòh-ê beh 久長享受伊。23 In 的確無空空 tiòh 磨, 所生 ê 亦無 tú-tiòh 災害; 因為 in lóng 是得 tiòh 耶和華賜福 ê ê 後裔, in ê kiáⁿ 孫亦 beh kap 伊有份。24 In iáu 未求叫, 我就應伊, tú-tú teh 講 ê 時, 我就聽伊。25 豺狼 beh kap 羊羔相 kap 食, 獅 beh 食草親像牛; 土粉 beh 做蛇 ê 食物。Tī 我 ê 聖山遍地, lóng 無損傷, 無殘害; 這是耶和華講 ê。

共同經課 - 2 以賽亞書十二章

1 到 hit 日, 你 beh 講, 耶和華 ah, 我 beh 感謝祢, 因為祢雖然 bat 受氣我, taⁿ 祢 ê 受氣已經 soah, 祢亦安慰我。2 看 ah, 上帝是拯救我 ê; 我 beh oá 靠伊, 亦無驚; 因為主耶和華是我 ê 氣力, 是我 ê 詩歌; 伊亦成做救我 ê。3 Lín beh tù 救恩 ê 水泉歡喜來 chhiūⁿ 水。4 Tī hit 日 lín beh 講, Tiòh 感謝耶和華, 求叫祂 ê 名, 將祂所行 ê 報揚 tī 列邦中, 講起祂 ê 名已經受尊做高。5 Lín tiòh 唱歌 o-ló 耶和華; 因為伊所行 ê 真顯赫; 願 chit-ê tai-chi 遍傳 tī 天下。6 錫安 khiā 起 ê 百姓 ah, lín tiòh 出大歡喜 ê 聲, 因為以色列 ê 聖 ê tī lín ê 中間做大。

共同經課 - 2 詩篇一百一十八篇

1 Lín tiòh 感謝耶和華, 因為伊是好; 因為伊 ê 慈愛永遠 tī-teh。2 願以色列講, 伊 ê 慈愛永遠 tī-teh。3 願亞倫 ê 家講, 伊 ê 慈愛永遠 tī-teh。4 願敬畏耶和華 ê 人講, 伊 ê 慈愛永遠 tī-teh。5 我 tī 危急 ê 中間求叫耶和華; 耶和華就應我, 將我 hē tī 寬闊 ê 所在。6 有耶和華 kap 我 tī-teh, 我就無驚; 人 beh 啥法得我 ta-oá? 7 Tī hiah-ê 幫贊我 ê ê 中間, 有耶和華 kap 我 tī-teh; 所以我 beh 看見 hiah-ê 怨恨我 ê 人受報應。8 Oá 靠耶和華, 比 oá 靠人 khah 好。9 Oá 靠耶和華, 比 oá 靠王親 khah 好。10 萬百姓圍攔我; 我 oá 靠耶和華 ê 名, beh 剿滅 in。11 In 圍我, 困我; 我 oá 靠耶和華 ê 名, beh 剿滅 in。12 In 親像蜂圍我; 親像燒刺 phè ê 火, 受 phah-hoa。我 oá 靠耶和華 ê 名 beh 剿滅 in。13 你出力 chhia 我, beh hō 我倒; 總是耶和華幫贊我。14 耶和華是我 ê 氣力, 是我 ê 詩歌; 伊亦成做拯救我 ê。15 Tī 義人 ê 布棚內有歡喜 ê 聲, 拯救 ê 聲; 耶和華 ê chiáⁿ 手施出大權能。16 耶和華 ê chiáⁿ 手 kiah 高; 耶和華 ê chiáⁿ 手施出大權能。17 我 boē 致到死, iáu 能活 teh; 續 beh 報揚耶和華 ê 所做。18 耶和華 bat 嚴嚴警戒我; 總是未有將我交 tī 死無。19 Tiòh kā 我開義 ê 門; 我 beh 入去, 感謝耶和華。20 這是耶和華 ê 門, 義 ê 人 beh 入去。21 我 beh 感謝你, 因為你已經應我; Koh 成做拯救我 ê。22 師傅所棄 sak ê 石, 已經成做厝角頭 ê 石。23 這是耶和華所做 ê, 咱 ê 目睭看伊做奇怪。24 這是耶和華所定 tiòh ê 日; 咱 tī chit 日 ê 中間 beh 歡喜快樂。25 耶和華 ah, taⁿ 求你拯救; 耶和華 ah, taⁿ 求你 hō 阮發達。26 奉耶和華 ê 名來 ê, 應該得 tiòh 福氣; 阮 tù 耶和華 ê 厝 kā lín 祝福。27 耶和華是上帝, 伊 ê 光照阮; Tiòh 用索縛祭祀 ê cheng-siⁿ 到壇角。28 你是我 ê 上帝, 我 beh 感謝你; 你是我 ê 上帝, 我 beh 尊你做高。29 Lín tiòh 感謝耶和華, 因為伊是好; 因為伊 ê 慈愛永遠 tī-teh。

共同經課 - 3 帖撒羅尼迦後書三章六節~十三節

6 兄弟 ah, 阮 tī 咱 ê 主耶穌基督 ê 名命令 lín, 見若兄弟無法度, 無照阮所傳授 ê 來行, lín tiòh 離開伊。7 因為 lín 家已知 tiòh 怎樣學阮; 因為阮 tī lín 中間末 bat 無法度; 8 也 m̄-bat 白白食人; 反 tng 是 tiòh 磨艱苦, 暝日做工, 免得拖累 lín 中間一人。9 m̄ 是因為阮無權, 獨獨是 ài 用本身做 lín ê 模樣, hō lín 學阮。10 因為阮 iáu kap lín tī-teh ê 時, bat án-ni 命令 lín 講, 若有人無 beh 做工, 伊也 tiòh m̄-thang 食。11 是阮聽見 lín 中間有人所行無法度, lóng 無做工, kan-ta 做份外 ê 事。12 親像 chit 號人, 阮 tiàm-tī 主耶穌基督命令 in, koh 勸 in, tiòh 恬靜做工, 家己 thàn 食。13 兄弟 ah, lín 行好事, m̄-thang 厭倦。

共同經課 - 4 路加福音二十一章五節~十九節

5 有人講起殿堂是用好石 kap 所獻 ê 物來裝飾, 6 hit 時耶穌講, Lín 所看見 hiah-ê 物, 日子 beh 到, tī chia beh 無一塊石留 tī 石 ê 頂面, 也無 chhia 落去。7 In 就問伊講, 先生 ah, án-ni 甚麼時 beh 有 hiah-ê 事? Koh chiah-ê 事 beh 成 ê 時, 有甚麼兆頭 ah? 8 耶穌講, Tiòh 謹慎免得受迷惑。因為 beh 有 choē-choē 人託我 ê 名來講, 我就是基督; koh 講, 時近 lah; lín m̄-thang 去 tè in。9 Lín beh 聽見交戰 kap 擾亂 ê 事, hit 時 m̄ 驚惶。因為 chiah-ê tai-chi 的確事先有; 總是末期無 liàm-piⁿ 到。10 就 kā in 講, 百姓 beh 起來攻擊百姓, 國也 beh 起來攻擊國。11 地 beh 大振動, 也 choē-choē 所在有飢荒、瘟疫; tù 天裡也 beh 有 thang 驚 ê 象 kap 大 ê 神蹟。12 Chiah-ê 事 ê 事先人 beh 下手掠 lín, khún-tiòk lín, 將 lín 送交 tī 會堂 kap 監牢, 也為 tiòh 我 ê 名帶 lín 到 tī 君王官府 ê 面前。13 Chiah-ê 事 beh 成做 lín ê 干證。14 所以 lín ê 心志 tiòh 決斷無事先掛慮 beh 怎樣分訴。15 因為我 beh 賞賜 lín 口才、智慧, 就是 lín ê 眾對敵所 boē 能抵擋辯駁 ê。16 Lín 也 beh hō 父母、兄弟、親戚、朋友解送; 17 lín 中間有 ê beh hō in 害死; lín 因為我 ê 名 beh hō 眾人怨恨; 18 總是 lín 一支頭毛也 boē 失落。19 lín 用吞忍得 tiòh lín ê 活命。